

開放文學 – 歷代筆記 – 夷堅丁志 卷第七

戴樓門宅 顯謨閣直學士林邵·年二十歲時·赴省試·入京師·僦居戴樓·門內所處極荒僻·人多言彼宅凶怪·以其僦直廉·不問也·數日後·聞堂屋兩山小兒語聲·喚僕登屋視之·無所見·次夕三鼓宿房內·有盜至·盡揭蓋覆衣衾去·而門窗如初·須臾一僕學所臥薦席·其下若新坎穴·衣衾在焉·又次夕·陰晦中一物墜地·聲甚大·至曉·乃花紋石段四五·各長數尺·里巷來觀·有識者雲·此州橋花石也·時方修橋·往驗之信然·遂徙出·

林氏婿婢

林顯謨長女·初嫁一武官·夫婦對飲·遣婢往堂後小圃摘菜·少頃·婿忽大叫仆地·如中風狀·至曉始蘇·婢亦方還·蓬頭垢面·衣服皆沾污·疑其乘隙有他過·詰之·雲·初入圃·放燈籠於側·以小刀掘菜根·方舉一窠·有小兒長尺許·自地蹣出·揮刀斲之·應手成四五兒·愈斲愈多·牽衣而上·遂為所壓墜·昏不醒·及覺日已出·度其見怪時·正婿得疾之際·婿自是感心疾死·林女後適中大夫任廡·

王厚蘿蔔

王厚·韶之長子·位至節度使·為邊帥·晚年歸京師·一日家集·菜樸內蘿蔔數十莖·忽起立·須臾行於案上·眾皆愕然·厚怒形於色·悉撮食之·登時嘔吐·明日死·幼弟彩·字輔道·宣和初·為兵部侍郎·坐天神降其家·被極刑·人以為詔用兵多殺之報·

天台玉蟾蜍

蔡州城西軍營中·有廟曰天台山廟·不知其義·廟中有石·高三尺·石眼有水·雖旱歲不涸·嘗為人發地測之·愈深愈大·不可窮極·又有小白蟾蜍·雪色而朱目·常在水中·或至人家·則為吉兆·朱魯公丞相勝非郡人也·崇寧四年春·得之於所居堂戶限下·以淨器覆之·周圍封志甚密·祝之曰·若果通靈·當自歸廟·至暮舉器無見矣·徑往廟訪視·乃在水中·是歲朱公登第·

濟州逆馬

政和初·濟州村民家馬生駒·七日大與母等·額上一目·中有二睛·鼻吻如龍·吻邊與蹄上斑文如虎·色正赤·兩膊皆起肉筋·一夕食其母·皮骨無遺·逸出田間·民慮其為患·集數十人追殺之近邸·畫工圖其形以示人·蓋獸中梟獍也·

南京龜蛇

靖康元年閏月·北虜犯南京·合圍方急·有穹龜見城中·大如車輪·高三尺·骨尾九條·甲色黃如蠟·每甲刻一字·可辨者八·雲郭負放生·千秋萬歲·餘不可讀·目光射人·頸鱗如錢·顧視殊不凡·留守朱魯公·命置於城隍廟·郡人爭往觀·公畏其惑眾·乃言龜不食·豈思水耶·投之南湖·不復出·繼又雷萬春廟有大赤蛇·蟠香炉中·累日不動·但時或舉首·人莫敢近·公作文祭焉·且言賊犯城·不施陰助·乃出異物以怖人·何也·即日蛇亡·凡受敵逾半年·竟不能陷·

秉國大夫

張邦昌為中書舍人·使高麗·至明州·謁東海廟·夜夢神告曰·他日至中書侍郎·但不可為秉國大夫·後數年·當宣和末·果有鳳池之拜·靖康元年正月九日·圍城中拜少宰·出質於虜營·挾以歸燕山·明年·都城失守·虜裔立為楚帝·遂坐誅·

朱勝私印

朱丞相留守南京·虜寇來攻·方修守備·夜巡城至南門·見壕外光照地·罔然如燭·遣人視之·無物也·謹識其處·旦而掘之·得一銅方印·大徑寸·古篆四字·曰朱勝私印·銅色深綠·製作甚精·朱公名勝非·而印·曰朱勝私·亦異矣·右八事皆見朱丞相秀水間居錄·

幹道八年·予仲兄留守建康·亦發土得印·徑寸七分·其文十二字·曰西道行營水陸諸軍都虞候印·欲考其何時而未暇也·

大渾王

聞人興祖·字餘慶·秀州人·博學有文采·魁侂豪梗·不拘小節·居於近郊·自稱東郊耕民·為州學錄·與學諭婁虞友善·紹興丁卯夏·虞以疾卒·秋九月·興祖夢一客來訪其居·緋袍跨馬·導從甚盛·諦視乃虞也·謂興祖曰·幸當與君聯事·呼後騎使升·曰·此馬頃刻千里·俯仰間身已據鞍·遂交轡而行·夾道列炬如畫·行數里·火光浸微·至大官府·中有殿南向垂簾·簾內燈燭明滅·廷下吏卒·或坐或臥·見二騎至·不為起·二人轉而東·復少北·有聽事對設兩榻·執事者鞠躬聲喏·虞揖就坐·曰·此君治所也·俄一小兒自屏間出·挽其衣虞曰·令嗣先在此矣·蓋數年前所失稚子也·虞曰·君且歸·徐當相迎·興祖方攬轡·蹶然而寤·明日·遍告常所來往者·疑為不祥·未幾因出謁·過婁氏之門·毛骨凜然俱竦·即得疾·扶歸家·信宿而卒·卒後其表弟陳振·夢見之·與語如平生·振曰·聞兄為冥吏·信否·興祖唯唯·振又曰·人持杯玃來卜者·兄能告以吉凶乎·曰·大渾王雅不喜此·振曰·然則兄為大渾王官屬邪·興祖遽曰·吾失言·吾失言·號慟而去·振驚寤·尚依約聞其哭聲雲·

張氏獄

政和初·宗室郇王仲御·判宗正·其第四女·嫁楊侍郎之孫·楊早失父·其母張氏·性暴猛·數與婦爭鬪·楊故元祐黨籍中人·門戶不得志·婦尤鬱鬱·張嘗曰·汝以吾為元祐家·故相陵若此·時節會須改變·吾家豈應終困·婦以其語告郇王·王次子士驪妻吳氏·王荊公妻族也·每出入宰相蔡京家·遂輾轉達於京·京以為奇貨·即捕張置開封獄·府尹劾以誹謗乘輿·言語切害·罪至陵遲處斬·二法吏得其事·曰·婦人尚無故殺法·安得有大逆罪·尹怒·並杖之·二人皆以瘡潰死·張竟抵法·行刑之日·郇王矍然不謂至此·驪與兩弟入市觀·未幾·輒相繼死·驪見婦人被血·躡屏帳間·又作鬼語曰·我本不欲校·無奈二法吏不肯·蔡京後感疾·命道士奏章·道士神遊天門·見一物如堆肉·而血滿其上·旁人言上帝正臨軒決公事·頃之·一人出·問道士何以來·告之故·其人指堆肉曰·蔡京致是婦人於極典·來訴於天·方此震怒·汝安得為上章·對曰·身為道士·而奉宰相之命·豈敢拒之·曰·後不得復爾·又曰·適已有符遣京送潭州安置矣·汝可亟還·道士寤·密以告所善者·又十年·京乃死於長沙·然郇王女及吳氏·俱至八十·

湯史二相

縉雲湯丞相·四明史丞相·紹興十五年乙丑·俱在臨安·湯公以政和令赴詞科·史公以進士赴省試·同詣韓慥問命·慥時方葺所居·僅留一席之地·每客來立談即逝·及二公至各言甲子·慥呼小女設倚·延坐置茶·咨歎良久·拱手曰·二公皆宰相·即日亨奮矣·皆不敢自謂然·是年並擢第·湯公由館閣翰苑登樞府·以丁丑歲拜相·史公方為太學博士·常語人曰·韓慥言湯公·信神驗·何獨至於我而失之·今之相望·真天冠地履也·庚辰之冬·湯公自左揆免歸·史公正直講建邸·用攀附亟還·癸未春拜相·

荊山客邸

韓洙者·洺州人·流離南來·寓家信州弋陽縣大柳村·獨往縣東二十里·地名荊山·開酒肆及客邸·幹道七年季冬·南方舉人赴省試·來往甚盛·瓊州黎秀才宿其邸·旦而行·遺小布囊於房·店僕持白洙·洙曰·謹守之·俟來取時·審細吩咐·黎生行至丫頭岩·既一驛矣·始覺·亟回韓店·徑趨臥室內·翻揭席薦·無所見而出·面色如墨·目瞠口哆·不能復言·洙曰·豈非有遺忘物乎·愀然曰·家在海外·相去五千里·僅有少物·以給道費·一夕失之·必死於道路·不歸骨矣·洙笑曰·為君收得·不必憂·命僕取以還·封記如初·解視之·凡為銀四十四兩·金五兩·又金釵一雙·黎奉銀五兩致謝·拒不受·黎感泣而去·明年·遊士范萬頃·詢知其事·題詩壁間曰·囊金遺失正茫然·逆旅仁心盡付還·從此弋陽添故事·不教陰德擅燕山·又跋雲·世間嗜利·為小人

之行者·比比皆是·聞韓子之風·得無愧乎·洙今見存·
夏二娘

京師婦人夏二娘·死經年·見夢其子杜生曰·我在生時·欠某坊王家錢十二貫·某坊陳家錢三十四貫·坐謫為王氏驢·而鬻於陳·王氏所得價錢償已足·而陳未也·日與之負麥·然一往反·才直三十八錢許·今日以外·尚欠十八千·非兩年不可了·吾昔日瘞銀百餘兩於堂內戶限下·可發取以贖我·其子曰·即往尋訪·以何為記·曰·明早從南薰門入·一騾最先行·別又一驢·次則我·汝來時·我自舉頭視汝·杜生寤·掘地得銀·徑詣南薰待之·果遇麥馱聯翩來·第三者仰頭相視·杜雨泣·欲牽以歸·陳氏之役曰·此吾主家物·汝何為者·杜曰·吾母也·當還原價以贖·其人不許·相與忿爭·廂官錄送府·府尹扣其說·命引驢至前·謂曰·果識汝子·可銜其裾·應聲而然·尹異之·時劉豫盜京師·尹具以白豫·呼入殿廷·復謂之曰·能舉前兩足搭於肩上·則信矣·應聲亦然·豫嗟異良久·欲官為給錢·杜拜曰·若爾恐母債不得釋·願自出錢而丐驢歸·豫許焉·杜掃一室·謹事之·又二年乃死·買棺加衣衾以葬·後朝廷得河南·杜氏子來歸·居贛州·為人話其事如此·

華陰小廳子

宣和間·陝西某郡守赴官·食於道上驛舍·一道人從外直入·聞者諭使去·不肯聽·家人望見亦怒·爭遣逐之·獨郡守延問其故·但云·尊官過華陰時·若見小廳子·幸留意·他無所言也·語畢徑出·守欲扣其曲折·使追之·不可及·泊入關·浮舟溯渭晚泊矣·從吏白有小吏持刺·稱華陰小廳子欲參謁·拒以非時·則曰·有一事將語使君·然吾祇役於邑中·來日朔旦·不可脫身·故乘休假馳至此·此去邑尚百里也·守憶道人語·命呼登舟·則又曰·所言絕秘·不願傍近聞之·必移泊北岸乃可·守又從之·舟人謂係纜已定·無故而北·豈非奸盜設計乎·北又非安穩處·不得已而行·迨至北岸·其人杳不來·盡室怨悔·業已爾·無可奈何·夜未半·大風忽起·如山頽泉決之聲·魚龍悲吟·波浪濺激·搖不得寐·兢憂達曉·望南岸既崩摧數仞·客舟同憩宿者·淪溺無餘·及到縣訪求此吏·蓋未嘗有也·一家免葬魚腹·異哉·

武昌州宅

劉亞夫·為武昌守·始入州宅·望堂上若有人·及升堂·正見婦人在門扇內立·垂雙足於外·親往視之·蓋新被刖者·履襪皆鮮潔·不見上體·立而不僕·劉疑以為奸人所為·陰察中外·寂無聲跡·凡停留兩日·乃命埋藏之·竟不測其異·孫革說·大庾疑訟